

陽城縣志卷之十

人物傳

宦業

北齊

上官顯願仕北齊高氏官輔國將軍時東西割據顯願當一面禦寇安民齊主以其有功敕儀同元雲祺營成周壁俾子孫世守之

宋

何漢榮深于韜畧端拱中爲殿前承旨充澤州太行路巡檢每恨

不識文字常于馬上使人讀孝經咸平中契丹侵河北漢榮爲
先鋒屢敗寇加銀青光祿大夫檢校國子祭酒兼御史中丞侍
衛親軍時王超守定州有尾大不掉之勢漢榮與楊延釗共謀
扼其吭于高陽關超不敢逞乾興元年充山東山西都巡檢天
聖中遷如京使安撫都監迨法任終于覃懷傳舍

元

鄭皋父名珪生而魁偉舉止異常及長武勇有力智識過人金季
喪亂率義旅鎮遏無敢犯境者上黨公張開知其才擢爲兵馬
提控覩鄭侯湘谷二流可漑屯城之田請于郡守霍公疏決之

民受其賜從事久積有勛勞進忠昌軍節度同知元初命爲本
軍節度使時當大亂之後民多逃匿流亡皋以恩信招撫安集
之安堵如故

鄭鼎字國器皋長子幼孤能自立讀書知大義既長有勇畧善騎
射初爲澤潞遼沁千戶從塔海紺不屢立戰功遷陽城軍民長
官憲宗征大理國鼎每奮身力戰上壯之世祖中統元年以功
遷平陽萬戶至元三年遷平陽路總管平陽地狹人衆乏食鼎
導汾水溉民田千餘頃修學校厲風俗民德之十三年移鎮鄂
州夏五月蘄黃二州叛鼎討之戰于樊口舟覆溺死年六十有

三贈中書右丞諡忠毅後加贈宣忠保節功臣金紫光祿大夫
柱國追封潞國公改諡忠肅

鄭制宜鼎子至元十四年襲父職仍戍鄂州十九年征日本造樓
船洲地狹欲徙民居制宜不許改授寬地居民感之城中屢火
或言恐姦人乘間宜捕其疑似者制宜曰吾但嚴守備奈何濫
及無辜東征請赴敵自効上以其父歿王事止一子不許請益
力乃命從以戰功授懷遠大將軍明年幸上都舊制樞府留一
員司本院漢人不得與至是以屬制宜遷湖廣叅政以籍沒叛
人財產賜之制宜辭上賢其守賜白金五千兩未幾拜內臺御史

史大德八年晉地大震平陽尤甚制宜承命存卹晝夜倍道兼行至則親入里巷撫瘡痍給粟帛存者賴之成宗素知其名眷遇殊厚每侍宴輒不敢飲上察其忠勤賜肉醢輒持以奉母上聞之特封其母潞國太夫人十年疾卒年四十七贈銀青榮祿大夫追封澤國公諡忠宣

鄭昂霄字顯卿鼎從子襲萬戶初就鎮見安樂堂處三軍者卑陋下溼歲死者衆出私錢更諸爽塏撫恤士卒備至順元土官宋隆濟弄兵從分省進擊功爲多由明威將軍進懷遠大將軍建立學宮延明師以教軍中子弟江北流民橫行鄂岳間親詣其

陽城縣志 卷之八
處散歸其民罪剽掠者延祐元年覃定遠大將軍戍廣西平
靜江二十四寨右江岑世興侵掠州縣招撫底定泰定二年廣
西徭賊大起詔昂霄督師洞寨皆降天歷用兵拜湖廣行省叅
政改行樞副戰于偃師西兵數敗復湖廣叅政征蜀抵播州石
虎關蜀道通歸辭疾不允卒年六十子濤

鄭濤字子壽昂霄子襲萬戶江北河南寇亂巡綽湖廣以獲賊多
進明威將軍湖南宣慰同知副都元帥至正十二年從平章也
先鐵木兒于裕溪等處屢立戰功十六年除河東山西道宣慰
同知禁兵戢暴民頌其仁廉謂之父母焉

明

原傑字子英正統乙丑進士少力學器宇魁岸爲御史巡江西人情帖服江西陳少傅德尊王冢宰行儉蕭都憲維楨諭知傑合詞荐爲按察使劾甯王奠培革其護衛肅清宿弊振舉頽綱墨吏咸股慄郡守某怙勢貪黷莫敢發卒懲其奸抵于法轉山東左布政使成化二年就拜右副都御史巡撫其地歲凶賑救民無流移召爲戶部左侍郎母喪去位江西盜發詔卽其家起之俾往督捕悉平改左副都御史還佐院事荆襄流民數十萬朝廷以爲憂祭酒周宏謹嘗著流民圖說謂當增置府縣聽附籍

爲編氓可實襄鄧戶口俾數百年無患都御史李賓以聞帝善之十二年遂命傑出撫偏歷山谿宣朝廷德意流民欣然願附于是大會湖廣河南陝西撫按官籍之得戶十一萬三千有奇用輕則定田賦民大悅相地勢增置州縣拓鄖縣城爲鄖陽府置湖廣行都司益兵戍選官吏流人得所四境乂安薦御史吳道宏自代自是鄖陽始設撫治矣傑以功進右都御史將還朝會南京兵部尙書缺以傑任之傑疏辭不許遂卒于南陽年六十一鄖襄民爲立祠詔贈太子太保錄其子宗敏爲國子生隆

慶中追諡襄敏

楊繼宗字承芳天順丁丑進士官刑部貴州司主事每聞囚許令
三日一櫛沐蘇活甚多決疑多所平反王忠肅劾薦知嘉興府
携一僕自隨署中蕭然如逆旅御史孔儒清軍按里酷虐多撻
死者繼宗榜市門御史杖人至斃者詣府報名孔大恨瀕行哭
入府署發篋視之敝衣數襲而已儒慙而去豪民張紳父子却
桐鄉解絹論死上官張敬受賄思成其獄詰繼宗以失王曰朝
廷又詰以原告曰知府數語塞而止時閹人多橫有織造秦品
者過遺以菱藕歷書不受而索金帛繼宗卽發牒取庫金曰金
具在與我印券品愕然不敢取海水爲患歲費帑三千金往治

之止一千金鑿石貫鐵至今塘岸如故九載秩滿超遷浙江按察使數與中官張慶忤慶兄敏在司禮讒之上前上曰得非不私一錢之楊繼宗乎敏懼遺慶書曰善遇之上已知其人矣擢巡撫順天會星變上疏歷指中官及文武諸臣貪殘狀且請召還中官出鎮者左遷雲南副使遂單騎入叛徭窟曰副使楊某來徭大驚羅拜卒撫定之地產金三司使日徵作器飭劾退之宏治中轉湖廣按察居無何復以僉都御史巡撫雲南三司多舊僚相見歡然旣而劾罷不職者八人未幾卒萬歷中追謚貞肅子墳

楊埧成化丁酉舉人會試副榜由國子學錄爲德王府長史頗能以禮匡正王及裁抑王府宦侍加正四品服俸卒

張綸成化辛卯舉人知陝西甘泉縣值流寇亂綸令子率民兵晝夜防禦外請援兵嬰城固守以待賊無所得遁去民賴以安

田鐸字振之成化戊戌進士歷戶曹郎命賑蜀誤遺敕書謫遂州知州州東有江洲八十二頃爲豪右所據鐸悉以還民建大小二十四橋又鑿三溪山以便行旅御史行部至訝民無訟已乃知無冤民太息去荐擢廣東僉事選四川叅議不赴以老疾告歸正德時劉瑾矯詔言鐸理廣東鹽法簿牒未明逮赴廣東未

就道而瑾誅或勸毋行不聽行次九江卒年八十有二

宋鑑字克明成化戊戌進士耿介不阿少有大志精力過人讀書
通宵不寐人謂宋鐵眼初令舞陽剛廉嚴正尤加意學校擢山
東道御史執法不避權勢出知廬州斷不留獄法不徇人囹圄
空虛貪冒絕跡每行州縣孜孜問民疾苦時大司馬馬文昇子
守六安不職吏科周璽魚肉鄉民鑑斥之不少恕在廬七年治
行最著尋調慶陽居一載以內艱歸遂不出性尤孝友常與弟
同寢食視姪猶子鄉評重之

張黻字廷儀成化甲辰進士初知靈壽清直簡默喜怒不形而判

斷執法不少借民立祠祀之擢御史按陝西有重獄當刑前吏畏避不敢決黻至立決之遷陝西副使所至皆以清白稱卒于官箚中惟俸金六十兩而已憲長令各屬致賄始得歸葬

白鑑字孔彰成化丙午舉人生而穎異倜儻有大志初令文登政尙寬簡以廉節自勵未幾以憂歸起補杞縣杞稱繁劇訟牒盈庭剖晰明當治行稱最調漢陰值劉瑾擅政遂棄官歸瑾誅復起洛南寬簡廉節三載告歸百姓遮留若失慈母居鄉謙讓寬厚人咸德之卒年九十有三

王珪字邦器宏治己未進士初授刑部主事繼補戶部督倉能別

奸弊晉刑部郎中遷陝西僉事平川陝之盜預有勞績尋調河南汝甯時劇賊劉六踞上蔡逼汝玪誓死守賊來攻城敗而奔衆欲上功玪以賊魁未殲不可因具陳賊可平狀朝命撲滅之有賊黨汝人趙秀母繫獄玪出之秀聞感激思効密白趙璠劉六合兵來劫玪因得先期募死士整兵仗至則一鼓縛其渠魁解送軍門紀功官吳玉榮索賄不應人皆優叙玪止賞綵帛銀牌亦卒不自言也歷兵備薊州及山東叅政俱著績命勘開原執貢使之誣不阿附人多忌之遂解組歸卒于家

張軌字信夫宏治辛酉舉人溫良貞諒敦厚誠懇蒞政公勤愛民

如子知延慶時武宗幸宣府三駢蹕于境嬖江彬中鎡張銳
守備孫璽周瑁輩求索無厭軌不爲動有馬元吉者宦黨也其
姪恃之以事私相屬軌繩以法無所徇焉馬遂誣奏軌得旨命
東廠處分人爲軌懼卒得白巡按章綸歎曰處危險而存心不
失其正當紛擾而遇事不避其難直哉守也遷萊州府同知居
萊三載才守益著卒于官

衛璣宏治中任河南陝州同知勤于吏治兼通經史練達時宜

楊文寶宏治中任陝西咸陽縣丞才兼儒律治孚遐邇當時推重
田濟號愚齊以明經授固安訓導諄諄善誘造就人才武宗朝疏

諫十事其固安門人蘇志皋張思誠立碑表其忠孝

郭昊嘉靖乙酉舉人溫良質直寡言笑交遊不妄容儀有度令淄川寬易簡靜引水以溉田決疑獄以伸久枉縣舊供上官煤炭昊請分派隣縣以甦淄民由是忤三監司各不悅左遷懷慶府教授卒于官禮部侍郎何塘誌其墓第昌別有傳

見文苑

張好古嘉靖癸未進士性剛毅有爲不畏權勢初令元城時皇親陳氏怙勢作威福好古執其弟姪以法繩之被奏繫詔獄謫靈臺典史復鹽城令陞刑部主事終四川僉事先是陽邑均徭溢額大爲民累好古奏豁民甚德之

李喬芳字南峰嘉靖舉人知臨潼治多近情不爲已甚案無留牘而越訴者必懲一時推有司之良遷眉州知州

李彖號西谷嘉靖辛丑進士律已端嚴臨事詳慎令郃陽民狡悍多逋課彖催科撫字並行燒俗丕變以法誅豪強民有多除虎之謠陞河間府同知晉河南僉事歷叅議副使叅政湖廣按察使肅憲度恤刑獄以平叛人師尙詔功陞河南右布政轉山東左布政平賦役節財用賑饑凶善績懋著計曹薦章數十上詔加食一品俸告歸林下優遊十餘年年七十一卒

王國光字汝觀嘉靖甲辰進士初令吳江隣邑有疑獄來質訛輒